

Friûl di Jevât

PAR CURE DA LA SOCIETÂT FILOLOGJICHE FURLANE

Vie Ascoli, 1, Guriza - tel./fax 0481533849 - gorizia@filologicafriulana.it - www.filologicafriulana.it

L'insegnament dal furlan al è pardabon une ocasion speciâl di incesite par cetancj motifs

Fin ai 28 di Zenâr i gjenitôrs dai scuelârs a an timp par iscrivi i fruts a lis scuelis di ducj i grâts: infanzie, primarie, secondarie di prin grât e superiôrs. Simpri tal moment de iscrizion si pues decidi che i fruts a imparedin ancje il furlan.

Te sperance che si lu dopredi ancje a cjase e no si lu impari dome a scuele, l'insegnament dal furlan al è pardabon une ocasion speciâl di incesite par cetancj motifs.

Prin di dut parcè che i fruts a scuvierzin lis lôr lidris, culturâls e identitariis, che a son une vore impuartantis pe lôr incesite culturâl.

Po parcè che l'insegnament dal furlan nol è dome contâ ce che al succedeve une volte, come lis contis dai nonos o ben lis tradizions di une volte e vie indenant, ma al è ancje une ocasion di insiorament des cognossincis.

Se si fâs cês il furlan al è une fate di sume des lenghis che o vin ator: pal sigûr di divignince latine, ma ducj i popui che a son passât chi di nô, dongje di robariis e disgraciis, a an lassât ancje cetantis peraulis e elements de gramatiche dal furlan. Juste par fâ un esempli, il plurâl dal furlan si fâs zontant une "s" al singolâr come che, par esempli, al sucêt cul inglês. E cetancj altris a saressin ju esemplis.

No dome, in grazie des gnovis metodologiis di insegnament il furlan nol è plui une materie par so



Furlan a scuele:
no dome siele
di identitât

***Il Centri Docuscuole
de Filologjiche
al à passe mil esemplis
di materiâi didatics di cualitât
pal insegnament de marilenghe***

cont, ma al è integrât tal insegnament des altris disciplinis: vâl a di che si pues doprâ il furlan par imparâ no dome la storie e la gjeografie, ma ancje la matematiche, lis sciencis, la logjiche e vie indenant. Cheste metodologie si clame CLIL, acronim dal inglês "Content and Language Integrated Learning", che al vûl di insegnament di contignûts doprant une altre lenghe, tal nestri cês il furlan.

E je une tecniche che e sta simpri plui cjapant pît ancje chi di nô tes scuelis dal Friûl: e vâl pal inglês, e vâl

ancje pal furlan.

Di cetancj agns il Centri regionâl di documentazion, ricercje e sperimentazion didatiche pe Scuele Furlane (Docuscuole), la strutture de Societât Filologjiche Furlane che e je dedeade ae scuele, no dome e cjape lis propuestis didaticis CLIL che a vegnin fatis des scuelis ator par dut il Friûl, ma ancje e promôf la elaborazion e la produzion di materiâi su cetancj argoments che a doprin il furlan come lenghe par insegnâ altris contignûts.

Vie pai agns a son stâts publicâts une vore di imprescj pai docents des nestris scuelis: la serie di "Marilenghe te scuele", prime pe scuele primarie, daspò pe infanzie e par finî pe scuele mezane; i materiâi produsûts inte suaze dal progjet Interreg "Educa 2"; ancjemò lis unitâts didaticis par cognossi la prime vuere mondiâl in Friûl, e, tai ultins doi agns, par cognossi ancje personalitâts nostranis sicu Jacum Pirone e il "nestri" Ugo Pellis.

Ducj chescj contignûts a puedin jessi consultâts in maniere libere no dome dai docents - che si spera che ju dopredin! - ma ancje des fameis diretamentri dal sît internet dal Docuscuole www.scuelefurlane.it, indulà che e je ative une bancje dâts cun passe mil progjets, materiâi, libris e altris ativitâts fatis par furlan des nestris scuelis.

Si che duncje imparâ il furlan nol è sierâsi inte nestre piçule Patrie, ma al è vierzisi al mont.

Une vite cetant intrigade

"Bepo Fari" di Visc, une storie te Grande Storie

Ason storiis che no fasin part de grande storie, pal plui dineadis e no cognossudis.

Ason storiis che a fasin par de storie des nestris comunitâts e che, cul lâ dal timp, a van dismenteadis. Al è compit des nestris comunitâts fâ in mût che chestis storiis no ledin pierdudis.

In cheste benemerite ativitât si à di segnalâ l'impegn di cetancj di lôr in ducj i nestris paîs che si impegnin par cjapâ sù, notâsi e se si rive ancje publicâ chestis memoriis che a fasin part - a ducj i efets - de storie de nestre int. In cheste suaze si inseris ancje l'ultin lavôr di Ferruccio Tassin "Bepo Fari & il grop di Salomon", che al è stât publicât a la fin dal an passât.

Chest librut al conte la storie, lis strussis e lis disgraciis di Giuseppe "Bepo" Urizzi (1889-1945), fari di Visc che al à vude une vite cetant intrigade. Tassin no dome al recupere la storie di una memorie orâl di Ezio Urizzi, fi di Bepo, ma le inseris intun contest inmò

***L'ultin lavôr
di Ferruccio Tassin
al conte la vite
di Giuseppe Urizzi
(1889-1945)***

plui complès che al è la storie tra la fin dal Votcent e la prime part dal Nûfcent e in chest al è il merit plui grant - e la abilitât dal autôr - di chest librut. Intes nancje cincuant pagjinis dal librut a svualin vie duncje la storie umane di Bepo che si autodefinive "l'ambasadôr" di Visc par vie che te vuere grande al jere stât fat prisonîr dai Rus e al rivà a Tokyo e a Pechin indulà che al è restât ancje dopo de fin de vuere. Dome tal 1922 al è tornât a cjase a Visc, tal fratimp al jere cambiât dut: il stât par cont che al veve scombatût nol esisteva plui e cumò ancje Visc al jere Italie, di chês tieris "fatis talianis cu la

slope".

La vite di Bepo e va indenant, tra intrîcs e disgraciis, fintremai a la fin de sò esistence terene, tal Zenâr dal 1945, cuant che al lassà la anime a Diu. Sul sfont di dute la vicende al è il grop di Salomon, puartât incà de Cine, une sorte di "puzzle" di fier che se metût e incjatrât intune cierte maniere e vignive fûr une figure come une stele e dome lui, Bepo, al rivave a meti a puest. E come il grop di Salomon al è chest librut: un test che al conte une storie che si incjastre ad implen cu la Grande Storie.

Feliciano Medeot



Oportunitât

■ Pai zovins

Servizi Civîl Universâl cu la Filologjiche

Pai zovins di etât jenfri i 18 e i 28 agns e je une oportunitât cetant interessante: fâ un an di servizi civîl cu la Societât Filologjiche Furlane! E je une bieles ocasion par colaborâ a lis ativitâts dal Istitût, cul impegn te promozion de lenghe e de culture furlanis.

Di fat i 4 voluntaris di Servizi Civîl Universâl a colaboraran te organizazion e gjezion di events e manifestazions di promozion de lenghe, de culture e de identitât furlanis tant che convignis, concerti, presentazions di libris; a saran impegnâts te produzion e difusion di contignûts di comunicazion tant che comunicâts stampe, inzornaments dai profîi social e di sîts internet; a judaran il lavôr di supuart a lis ativitâts di formazion, informazion e editoriâl pe scuele furlane.

Lis domandis di partecipazion a an di rivâ dentri des oris 14 di miercus ai 26 di Zenâr dal 2022 dome online, cul colegâsi al link domandaonline.serviziocivile.it. La durade dal servizi e je di 12 mès cun 25 oris par setemane (par un total di 1.145 oris): ai voluntaris ur spiete un assegn mensîl di 439,50 euros. Par vê plui informazions si pues viodi la pagjine dedicate al Servizi Civîl Universâl sul sît filologicafriulana.it